

Na osnovu člana 23 Statuta Brčko distrikta Bosne i Hercegovine, Skupština Brčko distrikta Bosne i Hercegovine, na 100. sjednici održanoj 30. septembra 2004. godine, usvaja

## **ZAKON**

### **O IZMJENAMA I DOPUNAMA ZAKONA O PORESKOJ UPRAVI**

### **BRČKO DISTRIKTA BiH**

#### **Član 1**

U članu 5 stav 2 Zakona o Poreskoj upravi Brčko distrikta BiH («Službeni glasnik Brčko distrikta BiH», broj: 3/02) dodaje se slijedeći tekst: «Direktora u vršenju njegovih dužnosti mijenja zamjenik, a koji je šef sektora i koji u njegovoj odsutnosti obavlja dužnost direktora. Prava i dužnosti zamjenika direktora, kao rukovodećeg javnog službenika, utvrđuju se Zakonom.»

Iza stava 4 dodaju se slijedeći stavovi:

«5) Direktor ima pravo na godišnji odmor od trideset (30) radnih dana tokom kalendarske godine.

6) Ukoliko prezentuje dokaz o nesposobnosti da obavlja svoja prava i dužnosti zbog bolesti i nesreće, automatski ima pravo na bolovanje u skladu sa važećim zakonskim propisima.

7) Bruto plaća direktora utvrđuje se u procentualnom odnosu između bruto plaće gradonačelnika i bruto plaće direktora, zatečene na dan stupanja na snagu ovog zakona, a osnovica za obračun je bruto plaća gradonačelnika Brčko distrikta BiH.

8) Direktor ima pravo na naknadu svih materijalnih troškova koji su nastali kao rezultat obavljanja funkcije i druge naknade pod uslovima i iznosima propisanim za poslanike Skupštine, te javne službenike i namještenike organa uprave Brčko distrikta BiH.

9) Na kraju obavljanja funkcije, direktor ima pravo na prijelaznu novčanu naknadu, pod uslovom da je funkciju obavljao najmanje jednu punu godinu, a u iznosu plaće koju je imao u periodu obavljanja funkcije.

10) Period isplaćivanja prijelazne novčane naknade će biti 3 (tri) mjeseca i počinje nakon mjeseca u kojem se funkcija završila. Period isplaćivanja će se nastaviti po jedan mjesec za svaku punu godinu obavljanja funkcije nakon isteka jedne pune godine.

11) Ostvarivanje ovog prava će prestati:

- protekom vremena propisanog u prethodnom stavu ovog člana,
- na kraju onog mjeseca u kojem je direktor primio plaću za svoj rad ili je ostvario pravo na penziju.

12) U slučaju smrti, pravo na prijelaznu novčanu naknadu prestaje na kraju mjeseca u toku kojeg je bivši direktor preminuo.

13) Mandat direktora prestaje istekom roka na koji je izabran.

14) Po okončanju mandata, lice koje je obavljalo dužnost direktora Porezne uprave ima pravo da bude imenovano, postavljeno, odnosno raspoređeno na radno mjesto u Poreznoj upravi Brčko distrikta ili drugom organu uprave Brčko distrikta za koje ispunjava propisane uslove.

15) Po okončanju mandata, namjera za rad u Poreznoj upravi, odnosno za rad na odgovarajućem radnom mjestu u drugom organu uprave Brčko distrikta, u smislu prethodnog stava ovog člana, podnosi se u pisanoj formi nadležnom organu koji je ovlašten za imenovanje, postavljenje, odnosno raspoređivanje. Prijava se mora podnijeti u roku od 2 (dvije) sedmice, nakon što okončanje dužnosti stupi na snagu. Nakon isteka tog perioda, pravo na prijavu prestaje. Od ovlaštenog organa se zahtijeva da odgovori na zahtjev za imenovanje, postavljenje, odnosno raspoređivanje na radno mjesto u roku 2 (dvije) sedmice nakon podnošenja zahtjeva.»

## **Član 2**

U članu 8, iza riječi «direktor» dodaju se riječi «i zamjenik», a ostali tekst ostaje nepromijenjen.

## **Član 3**

Ovaj zakon stupa na snagu u roku od 8 dana od dana objavljivanja u «Službenom glasniku Brčko distrikta BiH».

**Босна и Херцеговина**  
**БРЧКО ДИСТРИКТ**  
**БОСНЕ И ХЕРЦЕГОВИНЕ**  
**СКУПШТИНА БРЧКО ДИСТРИКТА**

**Bosna i Hercegovina**  
**BRČKO DISTRIKT**  
**BOSNE I HERCEGOVINE**  
**SKUPŠTINA BRČKO DISTRIKTA**

Broj: 0-02-022-341/04  
Brčko, 30. septembar 2004. godine

**PREDSJEDNIK**  
**SKUPŠTINE BRČKO DISTRIKTA**

**Mirsad Đapo, dipl. pravnik**